

## Tabell 3-k

### Anslag på frie inntekter i 2014. Kommunane

Tabell 3 viser anslag på vekst i frie inntekter for kommunane frå 2013 til 2014. Som frie inntekter reknast her skatt på inntekt og formue (inkl. naturressursskatt) og rammetilskot. Tabellen viser veksten etter anslag på rekneskap 2013. Alle tala er i nominelle kroner. Prisveksten i kommunesektoren i 2013 – 2014 er anslått til 3,0 pst.

Skatteinntektene, inkl. skatteutjamning, er den storleiken det er knytt mest uvisse til i veksten. Skatteinntektene blir anslått ut ifrå det samla skatteanslaget 2013 og 2014 for kommunane, og kommunane sine skatteinntekter i 2012. For skatt på inntekt og formue tek ein for kvar kommune utgangspunkt i skatt per innbyggjar i 2012, framskrive med innbyggjartalet i 2013. Ut ifrå skatt 2012 framskrive med innbyggjartal 2013, blir det rekna ut kva del som kvar kommune får av berekna samla skatt. Den delen blir nytta til å fordele samla skatteanslag på inntekt og formue mellom kommunane både for 2013 og 2014. I skatteanslaget er anslag på skatteutjamning inkludert. For 2013 og 2014 er utjamninga i skatteinntektene for kommunane 60 prosent.

I berekninga blir naturressursskatten halde konstant, dvs. på 2012-nivå (inntektsåret 2011).

Tala for rammetilskot 2013 er henta frå nivå ved revidert nasjonalbudsjett 2013. Rammetilskotet for 2014 er vist i tabell 1-k. Dei kommunevise anslaga på frie inntekter i 2013 og 2014 inkluderar ikkje tilbakeholdt skjønn, og veksten i dei frie inntektene blir difor påverka av nivået på tilbakeholdt skjønn i dei to åra. Tilbakeholdt skjønn kjem i tabell 3-k fram som ufordelte midlar for alle fylke. Den berekna veksten på fylkesnivå blir difor ikkje påverka av nivået på tilbakeholdt skjønn.

Sidan ein her antar at skatteinntektene berre varierar med innbyggjartalet, vil avvik frå veksten på landsbasis berre skuldast endringar i rammetilskotet frå år til år.

For å gjere tala samanliknbare, noko som er ein føresetnad for å kunne berekne veksten, blir frie inntekter for 2013 korrigererte for eventuelle oppgåveendringar, regelendringar og innlemmingar av øyremerka tilskot i 2014. I 2014 er summen av desse endringane 820,5 mill. kroner for kommunane. Korreksjonar i 2014 er vist i innleiinga til Grønt hefte. I 2014 er det ingen innlemmingar av øyremerka tilskot. Alle oppgåvekorrigeringar er gjort på kommunenivå, med unntak av korreksjon for avvikling av tilskot innanfor skjønnsramme til psykososial oppfølging etter hendingane 22. juli 2011, som er korrigerert på landsnivå.

Veksten i frie inntekter 2013 – 2014 blir berekna frå anslag på rekneskap for 2013. Ny informasjon om skatteinngangen etter revidert nasjonalbudsjett 2013 trekkjer i retning av høgare vekst i skatteinntektene til kommunesektoren i 2013 enn det som er lagt til grunn ved framlegginga av revidert nasjonalbudsjett 2013. Skatteanslaget for kommunane for 2013 er oppjustert med 1,45 mrd. kroner samanlikna med nivået i revidert nasjonalbudsjett. Kommunesektoren får behalde dei ekstra skatteinntektene i 2013. Skatteanslaget for 2014 (skatt på inntekt og formue) er 131,2 mrd. kroner.

Inntektsveksten frå 2013 til 2014, rekna frå anslag på rekneskap, er nominelt 4,1 prosent. Inntektsveksten for kommunane rekna frå revidert nasjonalbudsjett 2013 er 4,7 prosent.

### **Kolonne 1 – Anslag på frie inntekter i 2013**

Kolonne 1 viser anslag på rekneskap for frie inntekter i 2013. Anslag på rammetilskotet til kommunane, eksklusive skatteutjamning, er henta frå revidert nasjonalbudsjett 2013. Skatteinntektene er framskrive i samsvar med skatteanslaget for 2013 som ligg i nasjonalbudsjettet for 2014, med lik vekst for alle kommunar. I forhold til skatteanslaget i revidert nasjonalbudsjett 2013 inneber dette ei oppjustering på 1,45 mrd. kroner.

### **Kolonne 2 – Anslag på oppgåvekorrigerede frie inntekter i 2013**

Inntektene i kolonne 2 er anslag på rekneskap korrigert for oppgåveendringar, regelendringar og innlemming av øyremerka tilskot. Det tas utgangspunkt i det same anslaget som i kolonne 1. Oppgåveendringane det er korrigert for er nærare omtalt i tabell B-k og C-k.

### **Kolonne 3 – Anslag på frie inntekter i 2014**

Kolonne 3 viser anslag på frie inntekter i 2014. Anslag på rammetilskotet til kommunane, eksklusive skatteutjamning, er henta frå kolonne 9 i tabell 1-k. Ved berekninga av anslag på skatteinntektene til kommunane har departementet tatt utgangspunkt i kommunane sine skatteinntekter i 2012. Desse er framskrive i samsvar med skatteanslaget for 2013 og 2014, som ligg inne i nasjonalbudsjettet for 2014. Skatteanslaget for kvar kommune er deretter lagt til grunn for berekninga av skatteutjamninga.

### **Kolonne 4 – Anslag på korrigert vekst frå 2013 til 2014**

Kolonne 4 viser anslag på oppgåvekorrigert vekst i frie inntekter frå anslag på rekneskap 2013 til 2014 for kvar kommune i 1000 kroner (kol. 3 – kol. 2).

### **Kolonne 5 – Anslag på korrigert vekst i prosent frå 2013 til 2014**

Kolonne 5 viser prosentvis oppgåvekorrigert vekst frå anslag på rekneskap 2013 til 2014.